

INUIT ATAQATIGIIT INATSIARTUNI



UPA2022/061

6. maj 2022

Agathe Fontain

Qilalukkat nipinut illersorneqarnissaat siunertaralugu kangerlunni qaqortat qernertallu sivisunerusumik najortagaanni angallatit aalajangersimasut ingerlaartarnerisa killilerneqarsinnaaneranut periarfissat misissoqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut. Misissuineq UPA2023-mut naammassineqarsimassaaq iliuusissanillu aalajangersimasunik siunnersuutitaqassalluni.

(Inatsisartunut ilaasortaq Jens NapātôK´ Naleraq)

Siunnersuut qilalukkat, angallatit aaliangersimasut nipiliornerannut illersorneqarnisaannut sammivoq.

Siunnersuuteqartut, nipinut illersorneqarnissaat siunertaralugu kangerlunni qaqortat qernertallu sivisunerusumik najortagaanni angallatit aalajangersimasut ingerlaartarnerisa killilerneqarsinnaaneranut periarfissat misissoqquneqarput.

Siunnersuummi tunngavilersuutigineqarluni, "Ilisimatusartut misissuinerne allani takusinnaasimavaat issittumi qernertat sikusiummit 70 kilometer tikillugu ungasitsigigaluartut sikusiutip nipaani qimaatinneqartartut, soorlu aamma qaqortat nipiliorfinnit nigortitertut takuneqartarsimasoq."

Siunnersuuteqartup uumasulerituut qilalugarnermut kisitsisimanerat , pinarfik tamakkiissuunngitsoq allaavigisimasagaat eqqaaneqarpoq. Piniartunillu peqataatitsisoqarnissaa kissaatigineqarluni.

INUIT ATAQATIGIIT INATSISARTUNI



Nunarsuaq tamaat , silap allanngornera ersarissarneqartuarpoq.
Amigaatiginartarpoq, silap allanngornerata kingorna, piniagassat ingerlaarfii,
takkuttarnerilu aamma allanngormata erseqqissassavarput.
Uumasulerituunullu kaamattuutigissavarput, silap allanngornerata kingorna
piniakkat ingerlaafiisa , takkusimaartarnerisalu allanngornerat
eqqarsaatigissassagaat. Piniartunut tamakku tusarniaaffiginiarsigit.

Naalakkersuisut 2021-mi Kalaallit Nunaanni Uumassusillit
assigiinngisitaarnerannut periusissiaq 2030 akuerisimallugu oqaatigaat.
Naalakkersuisut uumassusillit assigiinngisitaarnerat, naasut uumasullu,
inatsisini attuumassutilinni aammalu piujuartitsiviusumik aqutsinikkut
illersorniarpaat aamma pingaartillugu oqaatigaat.

Piniartut Ittoqqortoormiineersut, Tasiilameersut Qaanaameersullu
oqaluttuarput, pingaartumik umiarsuarnit takornariartaatinit
akornusersuisartut oqaatigisimavaat.

Takornariartitsinermik ineriartortitsissaagut, piniarneq akiginagu.

Iluaraarput nalunaarusioqqaanngikkaluarluni, Nalunaarutikkut ingerlannaq
Naalakkersuisut suliaqarniarnerat. Kissaatigaarpullu Nalunaarutissaq
piujuaannartitsinermik aallaaveqarluni suliarineqassasoq. Nalunaarutissap
suliarinerani piniartunik suleqateqarluinnarnissaq kaammattuutigalugu
Naalakkersuisut allaannguutissatut siunnersuutaat akueraarput.

Ataatsimiititaliamut ingerlateqqipparput.